

# «Sun stà gugent president»

Radunanza da la SRG SSR Svizra Rumantscha

DA GION NUTEGN STGIER / ANR

■ **Tema central da la radunanza è stada la tscherna dal nov president da la societad. A partir dal 2019 survegn ella cun Vincent Augustin in nov president. Il Surmiran remplazza Oscar Knapp, el ch'è dapi sis onns al timun da l'organisaziun.** En il Plantahof a Landquart ha già lieu sonda la radunanza generala da la SRG SSR Svizra Rumantscha. Tranter ils numerus giasts eran er cusseglier guvernativ *Martin Jäger* ed il directur general da la SRG SSR, *Gilles Marchand*. A pled è lura er vegnì *Peter Kùchler*, il directur dal Plantahof. El ha fatg ina cumparaziun cun il Plantahof e Radiotelevision Svizra Rumantscha RTR. Omadus manaschis sajan da gronda muntada per tut las regiuns da noss chantun. Al Plantahof vegnan giuvens da tut las vals grischunas per daventar buns purs ed RTR cuntanscha cun sias emissiuns en tuttas 150 vals dal Grischun numerus auditurs. Kùchler ha er discurrì da la buna lavur dad RTR cun er adina puspè resguardar en las emissiuns da radio e televisiun l'agricultura.

## Ludà la buna lavur

Cusseglier guvernativ *Martin Jäger*, el ha cunzunt menziunà il grond engaschament d'*Oscar Knapp*, da *Ladina Heimgartner*, la directura dad RTR ed insumma da l'entir travagl en connex cun la votaziun da No-Billag. Il schef dal departament d'educaziun e cultura ha er ditg che la lavur cun Knapp saja stada exemplarica ils davos sis onns. En quels onns sco president haja el bain già dapli inquietezza che quietezza, en spezial pervia d'inginas votaziuns che hajan er pertutgà radio e televisiun. L'engaschi da Knapp per



Vincent Augustin (a san.), il nov president da la SRG. R cun Gilles Marchand, il directur general da la SRG SSR.

FOTO G. N. STGIER

RTR e per la societad purtadra, la SRG SSR Svizra Rumantscha, saja stà nunstanclentaivel, ha punctuà Jäger.

## Augmentà il dumber da commembers

Durant la radunanza è adina puspè vegnì drizzà buns plets envers Knapp, il president partent. El saja stà fitg gugent president, ha el ditg. El stopia remetter ses uffizi, tenor statuts la fin da quest onn, cunquai ch'el accumulainia 70 onns. Losch saja el che en quels sis onns sco

parsura da la societad saja reussì d'augmentar il dumber dals commembers dad 800 sin passa 1000 commembers. Cun quel pli grond dumber saja er stà diversas giadas pussaivel da persvader la direzziun da la SRG SSR a Berna a favur dad RTR.

## Er mess terms per in bun avegnir dad RTR

Sco success en ses temp d'uffizi taxescha Knapp las midadas fatgas en la direzziun

dad RTR. Cun *Ladina Heimgartner* sco directura haja il travagl ina persuna competent al timun. Ultra da quai haja RTR d'esser losch d'avair en sia retscha ina persuna sco *Flavio Bundi* per il post da schefredactor. D'introduir cun *Gian Ramming* in um che segna per il svilup dad RTR saja er vegnì fatg in grond pass per in futur da success, ha accentuà l'Engiadinais. Vitiers vegnia er che cun surdar a *Tamara Deflorin* l'incumbensa sco schefa da comunicaziun dad RTR ins da-

stgia esser pli che cuntent, menziuna Knapp. Quant stimà ch'el è stà ed è anc adina en chasa RTR a Cuira han in bel dumber da collavuraturas e collavuratur confirmà cun engraziar al president da la SRG SSR Svizra Rumantscha cun chant e musica.

## Dapli muntada a la giuventetgna

*Vincent Augustin*, il nov president da la societad purtadra dad RTR, sa legra fitg sin sia nova incumbensa. Per el saja quai ina vaira sfida e lura er ina sfida ambiziusa. Per esser sin il current haja er RTR da cuntanscher en l'avegnir la giuventetgna, suandar ils giavischs e las pretaisas da quella ed en spezial er tschertgar cun ils giuvenils il contact. Ina gronda sfida saja per el er da perseguitar e da star attent co che la SRG SSR mettia en la pratica la consequenza da la votaziun No-Billag, tge dastga e tge duess ella far ubain betg far, ha menziunà l'um da Mon. Er quai che pertutga la lescha da concessiuns saja segir en l'avegnir in tema cun surpigliar quel nov uffizi, ha ditg Augustin. Da guardar e da promover saja bain er en il futur ina collavuraziun pli stretga tranter tut las medias rumantschas.

## Da renunziar a ses presidi actual

Augustin ha presidià durant nov onns la Lia Rumantscha. Enfin il 2015 è el ultra da quai stà mainafatschenta da *Santésuisse Grischun* e dapi quatter onns fa el numnadamain part da l'Autorità da recurs independenta davart radio e televisiun, AIRR, u per tudestg UBI. Questa presidiescha Augustin dapi il 2016. Cun sia tscherna sco president da la SRG SSR Svizra Rumantscha vegn el però a dar giu quel presidi.